

澁
櫃
海
錄

一
本

自序

余自幼質鈍雅，不喜讀有韻之文，因之亦不願作有韻之文。童年應試，勉爲律詩。年十八入潮州韓山書院肄業，乃悉棄焉。及後辦學校事，革命益無意於斯道。偶因遊覽乘興而吟，意取記事，不求工也。遜之教授集，余文爲澄廬文集復集。余民國十年以來詩，因其時期分爲五卷。顏曰澄廬詩集，編入第七集。余素不能詩，詩固無可存者。若欲因詩以見余之思想及行動，則以爲記事之補焉可也。余詩既少，復多遺佚。除茲集外，其有爲師長所品評而能記憶之詩句，取錄如次，以見一斑。

余少假本族試館讀書室，小而舊牆壁黝黑。每值新年

自書字畫張懸以爲掩蓋業師張竹士先生來見余題
露根墨蘭句曰誰道有人和露寫托根無地怨東風愀
然不樂曰汝年甚少奈何作此語余謹對曰此鄭所南
先生句也師曰非心有所感何至書此次見余題梅句
云自有非常奇骨格愈經霜雪愈精神曰此是汝作否
余謹對曰然喜曰幸有此氣魄雖顛沛猶能有成不然
恐終飄泊耳時余年十七及今思之半生際遇猶不出
吾師當日之評語也

余年廿二負笈廣州吾師丘仙根先生

逢甲

好爲詩與

張君六士唱和秋興八首屬余步韻以和勉成奉閱師
見旌旗飄蕩多新色壁壘森嚴是敵屯句許爲沉痛見

長沙策漢空前席博浪椎秦誤副車句許爲工整見第八首最後結句英雄心血人間事芒碭當年豈有雲瞿然曰此彼可取而代也之氣須善藏之

辛亥三月廿九日革命同志起事敗葬七十二烈士遺骸于黃花岡余作黃花岡長歌數百言以寄哀會同志有以詠黃花岡詩見捕者友人將余稿焚去今祇記末段云……黃花岡黃花岡岡上黃花岡下魄精靈相通竟脉脉欲求遺魄已無踪祇有黃花可尋跡認將黃花作鬼魂世間一切原假借……當時同事見而笑曰狂生乃亦悟佛理耶

蒲留仙有云從此不作詩是亦藏拙之一道也余素抱

此旨然有時因遊因事不覺興發則又犯之而今而後
當益知勉耳

中華民國二十三年春

澄廬主人自序

澄廬詩集卷一

鄒魯海濱撰

鬱江舟中感賦柬君武

以下民國十年

古來談治桂，貧瘠似無方。耳食寧足信，身歷知其盲。江河布四境，阡陌遍窮鄉。灌溉適耕種，氣候少寒涼。亦有山起伏，五金無盡藏。牧畜向原隰，百草冬不黃。天生此膏壤，人事乃不臧。童山嗟濯濯，田園半拋荒。縱有播五穀，耘漑力不將。生滅聽其便，業已有餘糧。土腴適養惰，工商都已忘。何況集資力，採礦闢牧場。現耕還現食，自謂高義皇。旣不謀交易，復不積庫倉。一有災凶歲，束手徒徬徨。哀哉我桂民，天厚乃自亡。更有關政治，交通殊

不良出產卽豐富如何赴市場與其多積腐盍少安毋
忙萑苻况滿地戒塗傷迷陽原因積種種遍地見瘡瘡
民貧雖自古土瘠實何嘗有此美山水發展何可量道
路多開築江河多通航世界接觸便智識乃啓揚謀資
興實業闢地民富康更加力教育人才日盛昌地亦無
棄利人亦無棄長莊嚴好世界卽此莽蒼蒼馬子大抱
負改造夙主張勉營成樂土莫羨東西洋

君武時爲省長每
羨東西洋故云

伏波灘

伏波灘頭水擊石奔騰鳴豈因蕙苒謗終古不能平

籐峽

籐連萑苻生籐斷萑苻絕理亂豈關籐化民當有轍

飛水巖弔黃鄧二女士

黃女士名芙蓉桂之梧州人世家也秀外慧中讀書明義感於三民主義年十七赴港入同盟會事革命鄧女士名務芬少備於人莫詳家世辛亥廣東光復余與姚君雨平率粵軍北伐女同志組織一女子炸彈隊從軍二女士與焉固鎮南宿州連捷清廷退位民國告成粵軍旋師鄧女士歸粵黃女士留上海黃克強先生家讀書及二年討袁失敗黃女士亦歸粵三年二女士以投飛水巖聞十年余勞軍南寧道經肇慶特往弔之據寺僧云二女士來時即出齋設二牌位爲誦經超度七日夜其第八日早發現兩身以帶相束之二女尸浮於寺旁飛水巖潭中在手囊內得其姓名及黃女士籍貫則超度之牌位實二女士之姓名因報知黃女士家其親屬來視時死三日矣而七竅驟來血並爲指點停屍及葬處甚詳黃女士年可二十鄧女士則二十而強皆未適人鄧女士善騎馬黃女士會備余講莊子齊物論謹後以陽明全集相贈討袁之役失去故詩中及之

天雁嗚啾啾蕭森正晚秋芳魂何處弔飛水帶哀流殺
敵情如昨雙坟木已修老僧頻指點山亦爲添愁
夕陽催暮景欲去復還留馳馬誇無匹遺書恨莫求舍
生曾許國共死竟何由泉下應猶憾干戈迄未休

秋夜見農人車水感賦

秋風蕭瑟秋氣強深宵擁衾猶怯涼月斜星稀夜過半
軋軋何聲來野塘披衣尋聲到塘畔農人車水三五忙
手足並用不少息赤身復無單衣裳池塘水淺水車小
力盡未足潤稻場詢之太息作且答連年爭戰田蕪荒
今春苦旱夏苦雨灌此聊謀百一償田主催租官催稅
收穫尙未計充腸况復烽煙猶四起天時晴雨更難量
向聞民國謀薄稅今見租稅幾倍常向聞民國爲民福
今見兵匪禍日長我生不辰乃如此敢免飢冷安睡鄉
我聞此語心痛惻轆轤恰似水車狂年來政治祇獎惡
滿地荆棘觸目傷惡者愈肥善愈瘦哀我農民莫自防
日夕胼胝不飽暖曳裙拱手餐膏粱何時霖雨遍萬物

洗盡痛苦登豐康

綏包途中雜詠

以下民國十四年

陰山月

包頭因陰山烏拉山互抱其北故名唐人詩云不教胡馬度陰山即此本屬蒙古地清初獎蒙人爲喇嘛喇嘛例不娶妻以綏遠計之清初有六十萬蒙人今祇四萬餘

包頭今亦祇見漢人不見蒙人矣

漫說當年爭戰地于今早屬一家春蒼茫依舊陰山月

不照胡人照漢人

河套皮舟

黃河流脈無定河套尤甚其舟皆用多數牛羊皮編成亦有用一牛皮漿之而渡者

河套奔騰無定流牛羊皮作渡江舟藏身別有新天地

莫問浮沉自在遊

趙武靈王長城

在歸綏縣北白道嶺上

築城爲國策籌邊自古防胡殆已然莫怨秦時興大役

武靈猶在始皇前

民國十五年二月與廣東大學選派留法員生此次選派

留法者教授吳康先生外男生為張農姚碧澄彭勤劉克平謝清顏繼金龍管興鄭彥芬陳書農女生為黃綺文李佩秀把晤滬濱相約至

西湖度春節友人張君稚鶴引遊諸勝出肴酒助

興盤桓數日極盡樂事爰為詩以記並勗留法諸

生以下民國十五年

生平好山水愛作西湖遊前後經三度鴻爪皆可留元

年國基定解甲放扁舟桃花笑迎迓携手多良儔同行皆廣東北伐軍

事同中流爭擊楫激波濺重裘六橋三竺勝終遜此一籌

忽忽十一載忙裏將閒偷冒雨尋諸勝丘壑更清幽興

酣繼以夜雲盡月當頭四望無舟楫獨占全湖秋今來

第三度剛值歲初周偕行諸同學春風舞雪侔梅花正
盛放登山涉水求雙峯玉皇頂縱步競力適誰云女子

弱先登非兜牟稚子年八歲追隨力不柔

時謙兒同行竟能自行登山頂

居高

俯視下一一盡目收山水雖依舊景物多非疇正思諸
境歷未得雪入眸天地驟變色飄瞥忽不休青葱湖山
水化作琉璃球舍陸而臨水一葉湖中浮鼓棹肆清興
舟中迭譚謳斯時樂所極凍苦不爲憂張子饒助興肴
酒與婦謀携來供醉飽相對意悠悠盤桓連數日莫識
世間愁同學皆年少難爲湖霸留行將去故國且盡酒
一甌吾華久不競西子失自由

近人西湖詩有於今西子嫁西洋句

力學以救國

雪此湖山羞行矣互勉勵物競勝者優

四十三歲初度感懷

天空星球恆河沙地球特爲其中一地球生物幾萬千
人類雜在其中出地球已小况人類人類豎有千古橫
九洲我身處此不啻滄海之一漚呱呱墮地縱百歲如
霧如煙如電逝我今春秋四十三渺乎少小安足計但
念己生天地靈爲人便須頂天立地永存眞奪取造化
福萬物形有生滅神無淪一身幾欲撐天地百歲應成
不壞身眼前富貴皆泡影赤去赤來何所幸眼前險阻
甘如飴動心忍性益猛省憶我生時境實辛父母忍饑
忍凍鞠育乃始得成人少年學書質鈍無所得弱冠拔
劍仗義不帝秦幾經挫敗遭放逐屢仆屢起改造國家

權歸民方謂國民從此登衽席何期年來蝸蟾痛逾昔
敢云赤手挽乾坤饑溺爲懷鄙飽溫立身行己無他道
返我初生爲人之元元當茲四十有三初度日有動於
中爲長言一漚雖云小百歲雖云促暴棄敢自甘致爲
人類辱努力猛向前日新毋自足求爲人類發異芒天
地同壽日同光庶無負乎天地生我父母育我之佳祥
亦安乎我之爲我之天良

澄廬詩集卷一終

澄廬詩集卷二

鄒魯海濱撰

環遊集

民國十七年

舟出吳淞口占

誰云此壯行斐遲歌去國周遊可興觀吾願師孔墨

舟入太平洋遇風風止得詩

放舟太平洋洪濤勢欲狂云是冷熱流於此一徊徨平
時已洶湧况值風力強海水襄船面駭浪撼桅檣柁樓
試極目入表竟昏茫回顧操舟者履險竟如常居危不
驚擾荆棘如康莊俄而風浪靜舉舟喜相望謀國亦如
此何爲翻覆忙

太平洋舟中望朝陽

大洋茫茫惟見朝陽白波相接碧水飛揚樓船乘浪梯
米太倉壺中天地飲食安康萬物羅列我心是王何小
不入何大不藏舉頭四顧渺乎八荒

太平洋舟中見白鷗

白鷗欸欸傍船飛雲水蒼茫何處歸我亦東西南北者
海天容與共忘機

月

去國十餘日今宵見月明朦朧雲妬月棖觸故園情
舟航太平洋因東行須重一日方能合曆所重之
日適爲余生辰戲吟一詩

東航逐度早逢寅重日方能合曆旬却喜今年花樣趣
連朝都報是生辰

羅省春感

春夢撩人別恨多江南桃李近如何料知嫩綠嬌紅候
正待東皇好護呵

羅省某俱樂部地佔數千畝極園林山水之勝選
舉時之發縱指示處亦飲食男女之窮欲處由其
黨員導遊後索書紀念冊爲書于左

入世出世塵襟洒然深山大澤龍蛇生焉

威爾遜山頂口占

山上積雪山下浮雲別有心證妙香微聞

題華僑開闢古巴及參加古巴革命史

異國錦河山吾僑慘膏血述之告世人未語先嗚咽

在羅馬以一千意幣購一美女油畫戲吟

浮海西來倦眼開浪游心得自疑猜此行莫謂無奇遇
難得千金載美歸

公共遊客車中戲吟

如雲遊客一車車亞美歐非共一家燕瘦環肥子都俊
噓寒問燠笑喧嘩

滑鐵盧

英荷等聯軍敗拿破崙處用當時
戰具鑄一大獅子山巔爲紀念

蓋世英雄喚奈何鐵獅高聳費摩挲當時鑄就九州錯
誰使普軍竟返戈

勝負由來本不常何須憑吊嘆拿皇威廉項羽稱無敵
一例傾亡在戰場

比利時弔歐戰各國戰士墳

纍纍白骨墳中皆善戰軍戰勝卽公理昂頭黯塞雲

亦培陵市

此市屬比利時歐戰時房舍悉爲燬火焚燬戰後由政府償款建築一律皆新莫辨其曾經大劫之地矣

劫後莫尋灰崇樓面面開城非人自在誰化鶴歸來

歸途遊博斯破魯斯海峽

此峽左亞右歐爲二洲鴻溝

亞洲依舊我歸來處處河山笑面開應是故園逢故主
禽魚草木在春臺

印度洋中戲吟

無風無浪渡重洋多食多眠益健康歸日略肥去略瘦

將加抵減適如常

印度洋次韻任先見贈詩

經年浮海水爲家破浪乘風敢自誇
醫國有心遠求艾回天無力愧催花
側身宇宙船嫌窄放眼雲煙願正賒
援溺吾人齊努力同舟珍重愛春華

抵粵喜賦

去國倏十月離鄉已四年一朝返鄉國
不盡意纏綿舊雨重携手新知快比肩
河山仍錦繡天日淨雲煙紅花樹日長
黃花花正妍桃李昔手植相對更欣然
物我忘形迹此樂言難宣

澄廬詩集卷二終

澄廬詩集卷三

鄒魯海濱撰

扶桑集

民國十八年

箱根山居

偷閒且浮海來此山中居所居在山頂登山喜有車車
路既委曲車行復舒徐雖高數千尺升降坦有餘

羣峯繞此山山復將室環起居此斗室儼然擁雄關舉
頭天覺窄伸手星可攀遠望海洋水週迴幾曲彎

山中雲氣多變化難捉摩時或出山岫時或生石坡忽
然濃似墨忽然淡如羅閒來出門步繞身恣婆娑

行獵此有禁樵採復絕無禽鳥滋生育飛行不我虞草

木殊豐茂來往須披扶桃源豈夢想人物皆安娛

山高四無障日出易見光安居此山上遂爾日月長醒
來取書讀讀罷且傾觴黃鸝音宛轉帶醉聽偏良

山中有溫泉家家用管延日夕事浴濯湯乃不用煎雜
沓渾無界爛漫眞其天襟解卽歡最堪笑淳于先

三島多火山此山居其一山中有一隅濃煙四處出附
近土成焦履之熱透膝有時復施威作聲殷然疾

生平愛山水此山恰有湖湖在山之凹尤覺世所殊環
湖山多麗湖水如碧瑜汪洋復清湛美比西子乎

山高水下倒遇峭遂成瀑衆瀑合成溪山流勢奔暴中
有石激揚水花時噴噪何必奏笙簧此音亦殊可

滿山成深林居在林中心坐臥花迎目徘徊葉拂襟月
來光掩映風過影升沈枝頭有好鳥時和我高吟
山居何所親花木與禽鳥觀之色紛紛聽之音嫋嫋來
去祇白雲履屐不相擾偶來居停問辭以語不曉
山深氣候寒盛夏怯衣單適逢風雨至重衾眠始安呵
手臨書畫溫爐對笑歡悠然別一境欲以語人難
山水饒清幽紛紛遊客遊舞詠盡學子謳歌多情儔在
山都策杖臨水好乘舟來往常一日何若我優游
觀山復玩水凡百莫擾余清心多妙悟無事自寬舒困
臥飢乃食晨興夜卽居連天風雨急閉戶讀唐書

寬盧以西湖漫興詩見寄次韻

側身西顧憶湖光柳綠荷新別樣粧雨過平隄芳草潤
風來隔岸稻花香啼鶯莫醒莫醒繁華夢浪蝶爭趨錦繡場
舉眼高峯峙南北當筵滋味共誰嘗

別來不覺幾春光依舊蘇堤有綠楊湖水已難分淨濁
天時偏自倏炎涼清潭明月澄心少古寺疏鐘引恨長
欲息泉林竟無處錢塘潮大水浪浪

鼓棹遊湖亦快哉船隨灣轉自然迴大都逐浪隨波客
孰是中流砥柱才渡水清歌驚客夢出泥蓮蕊爲誰開
最嫌汽笛嗚嗚響攪亂清平電艇來

登高最愛造危峰捷步連升不計重雲海茫茫正開眼
人天夢夢且敲鐘風過莫攪塵紛起日出無妨霧暫濃

獨立自商區宇宙誰云才大世難容

莫笑當筵醉不醒晨鐘暮鼓幾人聽雷峯倒後山誰鎮
西子歸來鶴姓丁孤島梅花自結實三天禪寺不聞經
陶朱已去錢王逝誰爲斯湖作障屏

劫歷紅羊局正難湖山湖水幾時安池林不見魚禽樂
羅網惟聞地域寬人競烈山奚借斧世皆竭澤笑持竿
怪他起伏錢塘水怒吼悲鳴慘不懽

湖山佳處盡歌場一夢成酣未熟梁吳越錢鏐曾作霸
春秋句踐亦稱王四郊祇見流民影萬國何嘗盛德章
縱有西施舟可載西湖豈易把嬌藏

濁世何心再滯泥湖蓮品格擬相齊不希靈隱仙居勝

豈爲煙霞小洞迷
潑潑羨魚游水快
嗷嗷哀雁帶飢啼
願將湖水清塵宇
世界何嘗樂在西

摘櫻桃取汁畫菊答滬上友人

摘取櫻桃作紫紅
染成秋菊付飛鴻
好教心事傳將去
猶是稜稜傲骨躬

蘆之湖

且比杭州與惠州
平生端好作湖遊
愛他如許澄清水
堪滌人間萬斛愁

臨石鼓文已竟集其字成詩二首

我來是處水陸優
游禽魚同樂王公
不求柳陰走鹿雨
止駕舟孔多佳趣
安我自由

時藝詞翰永日游游淵魚大道天高水流人以寧靜事
不用憂康樂可祝于世何求

別箱根

又趁秋風事遠征林園山水不勝情來時風雨歸時月
散盡陰霾一路明

澄廬詩集卷三終

澄廬詩集卷四

鄒魯海濱撰

朝鮮集

民國十八年八月

釜山卽事

屋矮天寬月更明
纖毫照見故民情
皮枯骨立精神憊
隱隱如聞慘痛聲
沿街席地坐衣冠
盡是遺民賣物攤
不少中邦文化集
傷心猶得見餘殘

釜京車中

車從釜山發
北向京城行
沿途見民舍
最足動我情
東斜復西倒
荒雜棘荆茅
茨殊不治
四壁塗泥成
寬廣

不數丈支持乏一楹蕭條空無物亂草肆縱橫牛馬同
寢處鷄鶩共盃羹山河雖信美居者不聊生禾麥離離
實耕者不得烹

古詩烹穀持作
飯烹字本此

此情一何慘哀哉亡國民

韓京雜詠

河山依舊主人非剩有殘宮映落暉閱盡興亡多感慨

不堪公子賦來歸

京城
晚眺

故宮禾黍不勝哀無復紅顏笑面開莫問當年歌舞地

雙雙麋鹿向人來

遊動物園在故
昌慶宮之一部

昌慶仍標舊日名森羅萬品自縱橫眼中盡是傷心物

故國年期總註明

遊博物館亦在故昌慶
宮專藏朝鮮古物者

一自夷氛布滿城中邦正朔已頻更蒼茫獨立橋頭望

此水猶傳漢字名

漢江橋望漢江

極目營屯滿野陂中分騎步砲工輜森嚴壁壘張威燄

不是韓師是日師

觀野外軍營

又聞博覽會場開水陸敷陳萬品材忽憶當年奇恥在

滿蒙物產附韓臺

九月日本在京城開朝鮮博覽會日本前開博覽會將吾國東三省及蒙古物用滿蒙物產名義與朝鮮臺灣並列

共昌共學復同化甘言幾令世同情如何壯徒老溝壑

閭巷不聞絃誦聲

內韓同化共昌共學乃日本在朝鮮之宣傳語

賣國人皆恨完用詔榮偏寫博文詩謂他人父今方衆

那有閒情再痛伊

京城旅次見李完用自書伊藤博文贈詩原詩云人生百事百難期白首相逢亦一奇三十年前君記否松陰門下讀書時

謁箕子陵

陵在平壤

來遊箕子國特謁箕子陵商周衰盛早陳迹此陵鬱鬱

猶峻嶒大同江水蜿蜒繞牡丹山峯蒼翠凝佳山佳水
善呵護三千年後我來登升階再拜多感慨茫茫對此
閱廢興此國文化實肇創至今人猶箕聖稱中間獨立
幾朝代屬附史乘相因仍三十年前尙一國今竟失統
爲人凌翩翩銜羽叩負走箕聖有靈應式憑箕井泉猶
湧箕林氣正騰願汲箕井水遍將腥穢澄君不見環陵
萬木長且密覆蔭此陵此國千秋萬歲無終絕

澄廬詩集卷四終

澄廬詩集卷五

鄒魯海濱撰

遼陽訪華表柱故址不得其處

以下民國十八年是年遊遼吉黑三省後遊晉十九年元旦出雁門關經

平綏路復遊遼再居晉

遼東丁令威仙成化鶴歸歸集華表柱下見人民非我
今來弔古徘徊不得遇徘徊不得遇但見纍纍墓噫嘻
吁纍纍墓華表歸仙豈有時山河黯黯送斜暉請看招
展臨風者多是傷心異色旂

山海關雜詠

長城綿萬里竟海峙雄關胡越一家久傷心見血斑

山海關

古壘連今壘新墳間舊墳由來爭戰地多少未招魂

忠魂碑

蒼莽山連海牛羊滿野陂西風吹塞草處處動秋思

角山遠眺

來遊角山寺寺內井泉奇烹茶清肺腑照面見鬚眉

角山寺井

泉

蠡屯民舍內云是國防軍俄境風雲惡邊聲在此聞

國防軍

南海境幽雅鳩居盡外夷怒濤終日激無限帶哀思

南海

晉遊感事

瀛海歸來興尙濃又從代北記遊蹤太行東走關山壯
汾水南迴險阻重譎術晉文羞創霸戲言唐叔溯初封
蒼茫感念今和古立馬山頭數亂峯

再過山海關

以下民國十九年

雪壓榆關道千山白盡頭天邊一樣月到此惹人愁

瀋陽旅次舊曆元夕記事

遼東作客報新年
檢點行囊有酒錢
今夜直須拚一醉
怕教歸夢惹情牽

生平自愧不知音
今夕何來隔院琴
彈罷似聞微歎息
滿天星斗起棲禽

草

關外離離草春融
一夕青雪初銷積
塊芽已吐新馨悵
悵來時跡枯榮幾
度經勞勞仍作客
不忍望歸亭

滄桑

閱盡滄桑百感平
由來世態反人情
養蠶尙不衣羅綺
飽飯何曾事種耕
季達孔窮原有例
顏殤跖壽莫相驚

君將歷史從頭看，消長機樞總可明。

猛虎

猛虎在深山，勢令百獸懾。蛟龍潛海中，時有雲氣接。聲威足驚人，牛後真臣妾。平生重意氣，豈爲好游俠。自有霖雨懷，濟川作舟楫。頭顱價十萬，所到人駭懼。終當起棟樑，寧忍甘同壓。

遊晉祠感懷

時擴大會
議移太原

虞叔祠前柏鬱蒼，槎牙枝幹傲風霜。剪桐盛事隨周逝，留得濃陰蔭古唐。

晉祠在
古唐村

懸甕山頭難老泉，義師祈禱憶當年。水流不盡興亡恨，

一讀遺碑一惘然。

唐起義時禱師虞叔祠事
成太宗貞觀時立碑其側

唐槐周柏互干霄憑眺盤桓逸興饒老衲不知興廢事
斜陽猶自話前朝

黝然古洞署雲霞避世前賢認作家

明亡傳青主先生
偕母隱此洞內

我亦帝

秦甘踏海仙源寧問有桃花

晉祠旁有
桃源村

晉祠四詠

周柏

晉祠周柏二一
橫臥一矗立

側身臨水不爲矮獨立參天豈厭高自是精神戰霜雪
虬枝鐵幹歲寒操

秦松

秦松屈曲似虬龍舞爪張牙向碧空飽歷滄桑多少變
驚濤時作吼天風

唐槐

莫嫌槐老半邊支
曾見唐皇禱義師
貞觀碑前永矗立
風雲際會想當時

宋柳

太原城毀柳依然
趙宋何曾億萬年

晉祠在太原舊城宋得天下劉繼元據太原最後降宋恨之因毀舊城移

太原于并州則今太原也

閱盡興亡渾不管
千條萬縷自籠煙

題約法草案

十九年起草于北平成于太原

百萬頭顱換得來
行間字裡血成堆
漫云大法都須價
舉國瘡痍劇可哀

題傅青主先生遺墨

以下民國二十年

青主先生奇男子
國變持節如山峙
穴居養母爲文章

餘藝書畫世莫比

趙秋谷推先生書爲當時第一

此書天矯若游龍自得天機

與人同

顧寧人稱先生曰蕭然物外自得天機

并州幾度見遺墨此紙尤訝有神工

從來書多以人重此人此書誰接踵令我觀書更懷人
天下滔滔心爲悚

畫蘭雜題

是年居津時作

葉不嫌亂花不厭繁珊珊秀骨香生筆端

筆求秀健腕求穩寬此是書法吾以畫蘭

無事靜坐展紙畫蘭異香自悟心泰神安

寧因雨減色好借風送香不倚嬌紅態自作衆芳王

我書本意造畫蘭亦如之莫笑野狐禪太古誰爲師

舟過汕頭賦寄志陸菊魂頌庭志人諸友

一別鄉邦十數年幾回歸夢竟難圓書生憂國難安席
偏趁東風看木棉

櫛比樓臺入望中車今同軌道同風艱難造就莊嚴界

留與鄉人細論功

志陸菊魂領庭先後任汕市長汕市開發多其力

雜處華夷列肆塵此中市隱有高賢却從醫國成功後

救世青囊號半仙

志人從事革命無役不與十一年後在汕設志人醫院

馳車密密看春光情怯非關已近鄉國難得舒歸里日
再從父老話滄桑

謁羅李陳三烈士紀念碑

羅侃亭李一球陳鉅海三烈士洪憲之役偕余討袁死事于汕蕭菊魂爲市長時商之潮汕鐵路公司得其贈三烈士就義地一段張我東任汕頭公安局長時集資立表紀念焉

仗義當年不帝秦傷心殉國李羅陳巍巍紀念今留表

撫事傷時獨愴神

中華民國廿一年十二月三十一日遊羅岡洞觀

梅 民國廿一年

避債無臺作洞遊

是日學校因領款不得未能依期發教職員薪

梅花迎我滿山邱却教

閒裏偏忙煞直到蘿岡峯頂頭

再度來遊逾十年梅花依舊世推遷老僧能說當時事

數到同遊倍黯然

老僧年七十餘為數前度同遊有伍秩庸先生及陳競存廖仲愷伍梯雲諸君

花下相逢豈偶然法師為我說因緣白雲點綴細商榷

也擬種梅補漏天

東坡廣東蒲澗寺詩云百尺飛濤瀉漏天是日與鐵禪和尚遇和尚云久別於此相遇亦是因緣為陳白雲山林場築亭以資點綴並擬於蒲澗寺

舊址築室種梅

四面山環是洞名聽來得失總難明

同遊為浙江薛教授祀光遊時不見穴洞問洞之名何由來余為述粵人

四面環山之處多名爲洞如黃婆洞龍眼洞之類是先生聞而大笑

嶺南事物原多異梅不春開雪不爭

歸途緩步領梅香訂日重來備酒漿行出村時天已晚
牧童處處叱牛羊

二十二年元月三日應吳敬軒先生之約與羅黼

月朱湯先温丹銘蔡秋農蕭菊魂諸先生再遊蘿

岡洞 以下民國廿二年

踐約竟重來梅花正盛開異肴嘗鹿脯 靜山在洞中爲鹿脯之宴得分而食之 美酒

試家醅 菊魂持家釀黃酒往飲 補壁題詩句 前次紀遊詩書成送寺僧 留痕坐石堆 同遊各人坐梅花下

石堆攝影 洞中別一境端不染塵埃 洞中門楣入署入勝出署出塵

和不匱室主人見贈難字韻詩

風雨連宵行路難蕭森天氣葉多殘埋頭忍敵心何在

求艾醫人興未闌蛇豕縱橫誰抵抗藩籬放棄莫遮欄
螳螂黃雀休誇勝童子從容弓又彈

似留國手禦危難歷劫重重局又殘壁上旁觀情莫測
異軍突起戰方闌高飛未遂須珍羽佳種宜扶急補欄
浮海亦爲吾道計時擬出洋寧同食客缺空彈

廿二年九一八前二日三疊難字韻

漫云天下事無難太息輿圖一角殘割地和戎非戰敗
引狼入室未情闌傷心元帥甘降敵蒿目書生空倚欄
食祿未能除國賊敢標高節免譏彈

遊九龍青山寺四疊難字韻

磴道懸空不畏難登臨一望白雲殘青山蒙恥腥羶染

佛地張筵意興闌秋到天南花不謝地當陸盡海無欄
偷閒探勝原尋樂四顧無端淚暗彈

澄廬詩集卷五終

澄廬詩集卷六

鄒魯海濱撰

國立中山大學新校雜詩

作于中華民國廿三年十一月十一日中山大學十週年紀念新校落成農工法三學院遷校

文法兩學院奠
基慶祝典禮時

覺舍縱橫入望中十週剛屆慶竣工從來締造非容易

令我低徊國父功

民國十三年春吾黨總理孫中山先生命余合國立廣東高等師範廣東法政大學廣東農業專門學校為國立廣東大學計今成立十週年適

新校落成

救國須培濟世才最高學府嶺南開當年國父兼師傅

講演三民月數來

國立廣東大學成總理每星期來校講演三民主義一次今之三民主義通行本即當日之演講稿而三民主義總理又解釋為救國主義

為策藏修擇地宜石牌山水最稱奇白雲側擁珠江繞

遠避塵囂合校基

石牌地方係國立廣東大學成立後總理擇為新校地址者

藍縷篳路啓山林寸寸山林盡化金樹木樹人兼樹穀

規模遠託百年心去歲余取管子一年樹穀十年樹木百年樹人語畧林場辦事處類為三樹軒今秋新校成余書篳路藍縷以啓山林八字刻石

親將博學數言留行易知難此可求今日重書示學子

好依遺教事藏修國立廣東大學成立時總理書博學之審問之慎思之明辨之篤行之貽本校今秋新校成余重書于石以誌遺教此五語楊少烟先生以為四

言知一言行是知難行易之旨

十年教訓勵諸生橫海深仇莫與京嘗胆臥薪句踐志

沼吳終久見功成去歲九一八余書十年教訓四字樹武彝山高處以勵諸生

校址宏開萬畝強跨連幾處領林場憶昔環遊摩納可

輿圖猶弱我宮牆摩納可係法國南方世界上最小之國余乘汽車半小時遊完其國本校校址實超過其國土

水抱山環擁禮堂居中形勝領諸方未能宮室百官備

基石渾如數仞牆全校以禮堂為中心禮堂未建只立奠基石一方

銅像巍巍國父儀羹牆如見日神馳他時救國完遺教

珍重無忘共告知

總理銅像在禮堂前去
歲九週年紀念日開幕

行省名區寄意深入門愛國發忠忱於今東北輿圖變

每到長城便痛心

校內分區各區以中
國行省之名名之

校萃名山地勢雄蒼蒼翠翠氣蓬蓬謫仙喜夢遊吳越

我竟婆娑五岳中

校內多山以中
國之名山名之

處處山光接水光五湖烟景費平章愛他潏灩湖中水

不載笙歌潤稻梁

校中有水數處以中
國各大湖之名名之

移山填坎地成平百尺高樓拔地生得到安居思創造

一沙一石費經營

校址在山中故建築時皆須移山填坎方
能成平地尤以土木工程系教室為最

院分文法理工農全體形成恰似鐘若網在綱毫不紊

只相調洽不相衝

本校有文法理工農醫六學院醫學院仍在舊址新校祇有五學院而分布全局有如鐘形

千間廣廈據丘岡學子莘莘盡猖狂從此潛修欣得所

切磋磨琢好成章

男女生宿舍分東西據數丘崗

蜿蜒交關路康莊蛛網縱橫達八方若問里程得多少

行來七十尙加強

本校公路除附建築物之公路外共有七十餘里

築塔臨流引水來更加鑿井近樓臺原泉混混晝和夜

學問工夫應悟哉

自來水塔在校東北引增城所來之水至水塔水塔未成之前並鑿井十數供用

工廠巍峨建築中計期煙突插天空於今閃閃電光亮

小用也經奪化工

工廠正建築發電廠亦未成現用小電機供用電

別開環境事蠶桑蠶理研求百種強自是嶺南佳氣候

一年八造繭優良

蠶桑館另在一隅其研究之蠶有百餘種而廣東育蠶每年有八造

稻作精研十數年居然成績著南天農人爭種中山白

我自鄉間聽互傳

稻作場在校南改良成績甚佳用其種能增收獲百分之三十農人爭種之中山白係改良之一種前年余訪蔣光鼐先生于東莞伊並為余親道

其事

高峯聳處天文臺日月星辰境別開測雨測風利民事

豈徒學術表奇瑰

天文台預定在武彝山最高峯

紅牆碧瓦額丹黃雙翼飛檐古殿妝共羨中邦佳式樣

莊嚴華麗軼殊方

所有重要建築均用古宮殿式外國人士來參觀者均得好評

山平坎滿廣千尋無數球場壁壘森願得練成好身手

偏教勇銳見於今

理工兩院中間有球場十二其地係填成者

一心祈雨復祈晴共笑書生太不情最好日晴宵降雨

不妨工事不妨耕

今春建築工程因趕秋季開課每忌下雨停工同時種植甚多又忌不雨致枯一日在車上沉吟此事不覺言曰最好日晴夜雨可兩不妨旁人聞

之而笑余
亦駭然

置之死地始能生豈好危言聳世驚自是捩心忍痛語

他時終自有分明置之死地而後生係新舍
建築開始時余對同事語

居然不日慶功成國庫私囊賴衆擎多士歡顏得大庇

詩章容我賦菁菁此次建築費由西南政務委員會撥船來肥田料捐及洋米稅一部又得
財政部由去年十二月起按月撥款及海內外踴躍捐款用能第一期建

築如期
告成

多少樓臺計日成又從平地事經營算來尙有千間厦

莫漫思量且力行去年三月開建農學院之農學館蠶桑室稻作場理學院之化學教室工
學院之電氣工程教室機械工程教室土木工程教室及男女宿舍七座

膳堂二座本年九月竣工十月建築農學院之農藝化學館温室牛房理學院之數學天文教室生物地質地
理教室工學院之化學工程教室文學院全座法學院全座及宿舍數座明年八月可以竣工若夫禮堂天文

台圖書館博物院體育館等則有待於
明年至以後擴充更非可以目前預計

忍痛經營計十年四隣今竟爲開筵樹人樹木求無愧

頌起輿人總坦然

石牌經營之始所派員生爲鄉人所毀去年及今年紀念四鄉皆送猪送酒舞獅以伸慶賀

鐘聲嘹唳講堂開濟濟員生上課來日不足時月計足

寸陰是惜勉乎哉

課上

把耒持鋤鎮日忙種瓜種菜種麻桑從今洗却空言託

學校原來實驗場

自遷校至石牌後學生皆加實習工作務達手腦並用之旨

課餘游藝各紛忙泅泳拋球互競強更有觀山與玩水

三三兩兩自成行

課餘

粒粒俱從辛苦來諸生每飯勿忘哉傷心中國農爲本

洋米何因市滿堆

膳堂

山居接觸自然多諸子情懷近若何但願堅貞效松柏

莫教依附似藤蘿

新校離市數十里校內復山巒起伏

種就青青百萬松他年長大看成龍四時不斷濤聲壯

自有堅操足耐冬農場種松可數十萬
林場種松可百餘萬

武彝山上是茶園儼若雲梯接斗門嘗試成功莫驚怪

勝天人定是名言武彝山闢為茶園一級一級有若梯焉廣州
附近不宜茶此次種茶係試驗但成績甚佳

綠竹春栽千萬竿也宜作壁也宜看他年密密成林後

枝好編籬筍好餐今春種竹二十萬多植四
週已可作圍牆又可供用

前度栽梅補漏天者番移植傍山巔此花每愛衝寒放

鬥雪凌霜態更妍去春在白雲山林場種梅數千株有在潤濂寺東坡詩所云百尺飛濤瀉
漏天處亦踐羅崗洞觀梅詩也擬種梅補漏天句現擬移附中之梅植于

新校

佳種波羅海外來離離結實遍山隈諸君莫自貪奇味

此果身中有刺堆波羅身有刺其種來自外國
尤以美國檀香山者為佳

荔枝從古嶺南佳結實纍纍傍水涯莫羨宮中妃子笑

尋常糯米壓同儕

糯米糍妃子笑均係荔枝名糯米糍味最佳妃子笑最劣

桃梅橙橘與黃皮菓木培成百萬枝四季有花兼有實

滿車入市競居奇

本校農場之菓市上稱佳爭購焉

菜根原本士夫風廣闢蔬園菜類豐花發滿園紅間白

可茹可玩嘆天工

今秋廣闢菜園全校蔬菜擬自供給

植菓培林費苦心他時結果悉黃金欲將教育成生產

我抱情懷不自今

農場林場共種菓木三百餘萬株五年有收益者可得五十萬株十年以後三百餘萬株皆可收益

鷄舍牛房列幾行園中猶有養猪場叮嚀畜牧供需要

第一先宜校富穰

本校畜牧擬先供足本校食用

劉義將軍舊將臺每登遺壘輒徘徊抱薪救火傷今日

安得干城不世才

劉義將軍即劉永福將軍中法之戰屢挫法師現新校即其駐軍處尚有遺壘數座

入門亭額署菁菁饑溺為懷勵各生得豆得瓜因各種

天人一理至分明

進校門有菁菁亭其聯為種瓜得瓜種豆得豆人溺已溺人饑已饑

一亭峙立水中央消夏曾來備酒漿傍晚歸時輕棹槳

微波蕩漾入斜陽

洞庭湖有一亭額曰湖中亭本夏初成張農主任曾設宴于此

回首當時不勝情十年樹木已繁榮建亭合是留鴻爪

締造艱難為署名

十週紀念日農學院員生集資建亭于創始經營被毀處余為書締造艱難四字

禹惜寸陰陶惜分共成日晷策精勤此中用意殊深遠

少小無成老曷聞

十週紀念日法學院員生集資建日晷

詩文字畫不嫌多草木禽魚擬廣羅佳種滿園飛躍趣

篇章尤得記經過

十週年遷新校曾徵詩文字畫並盼學生能以鄉土之草木魚鳥為新校紀念

藏拙經年戒又開詩成五十漫敲推琳琅珠玉佳篇什
也許拋磚引得來

蒲留仙言從此不作詩是亦藏拙之一道余屢欲守其戒
去年至今不作詩經年矣此次乃吟成五十首又破戒焉

澄廬詩集卷六終

澄廬詩集卷七

鄒魯海濱撰

遊九龍宋王臺

民國廿三年

宋王南走來窮荒當年有廟留吾鄉相傳船前敵在後
船父委王王徬徨持竿樵婦羣突出敵爲驚却船無傷
縉船出險正西走布帆指日收南疆何期天厄繼人厄
滔滔海水方飛揚荒臺斜日峙終古想見豆粥情倉皇
兩石相間不盈丈上覆一石人可藏天風怒號波浪吼
百靈或者朝宗忙雖云珠江盛王氣此時無補厓山亡
咄哉夷狄犯中國結局往往關炎方宋亡於南明繼之
父老涕下思冠裳珠崖一割孰秉國不割亦棄眞荒唐

國父義旂起百越河山一日還堂堂痛心繼事竟不肖
又令東北狐兔場我今登台感家國中原一髮青茫茫
何時雪恥復故物大風再使歌泱泱

步韵送不匱室主人出洋并柬陳石遺冒鶴亭二

先生

以下民國廿四年

聞公有遠行二老倏然至

明日公行今日石老鶴老聞之倉卒來港送行

各贈送行詩肺

腑託文字

鶴翁送行詩有槎牙積肺腑句

公行我獨留

前歲我擬出洋公贈以詩後不果行今公行而我留焉

惆悵觸

情思衆生雖芸芸物原聚以類爲念斯人徒遲遲不忍

棄奈抱濟世心恨無補時事作此破浪行仍是普渡意

東海正揚波

時日本正要求南京政府履行塘沽協定秘密條件

終仗樹漢幟嗟哉三折肱誰

體此中味

臨別步不匱室主人留別韻送行

曾聞父母重生男有女如公世豈諳萬里侍親從古少
十年浮海計今參撫時何策完燕北憂國多詩似劍南
不悵臨分且珍重佇歸瀛海九州談

贈石遺先生遊羅浮

石遺先生來遊羅浮阻於雨水繞道以赴謂與羅浮一點頭於願亦足故遊期
祇定二日以視余懷願二十年而仍未一遊者其興致爲何如哉詩以贈之

務與羅浮一點頭是翁雖老興偏適廿年未遂登臨願
輸與先生二日遊

昨再約遊羅浮今又不果詩送石遺協之二先生
豈真約不到羅浮昨計偕行今又休心與詩章附蠟屐
神遊三百六峯頭

次韻送石遺先生北歸

先生八十尙生男，難怪奇名海內諳。
度嶺古來推翼鑠，遊山幾值恨差參。
啖餘丹荔容歸北，開到紅棉願再南。
卅首詩成清欠債，炎方一月好資談。

協之先生以乙亥七月詩賜示步韻奉和呈政

共仰先生清貴人

段中軍道王右軍云逸少清貴人

文章德業與時新，三千子

弟狂和狷滿座賓，朋淡以親

莊子云君子淡以親

詩話品才推識卓

先生現編

有清一代詩話

書姿隨意見情真，黃花晚節香彌雋

先生有黃花館主之章

瀟灑

從容自出塵

諸公袞袞盡庸才，坐使河山付劫灰。
帷幄未容空涕淚，瘡痍誰起每低徊。
共瞻南極存魯殿，先許瓊筵奉壽杯。

顯晦動關家國運當年曾見大蘇來

今夕秋光月上遲

先生七月下旬生日去年先生繼室以七月終故先生第三首詩傷之

燈前有語向公披

縱能六十不為別便到百年終有離觸景難忘傷比翼
寬懷原屬慰蛾眉親朋兒女張歡宴正好傾杯痛飲時

南京憶辛亥

統師入城

辛亥冬某月某日余統廣東北伐軍前隊入南京城見沿街懸旗老幼拍手歡迎莫名其妙後始知黃克強先生原定是日入南京就副元帥職屆時不至而

余至
焉

統師當日入南京老幼沿街拍手迎都訝元戎怪年少

那知馬是上書生

掃葉樓題詩

余師丘仙根先生登掃葉樓題詩有掃胡如掃葉句余登掃葉樓和其詩用飛白字題之老僧頻合掌對飛白字贊好余笑問曰詩不好乎老僧急

合掌曰詩亦甚好詩亦甚好相視粲然

曾和余師掃葉詩漫將飛白字題之老僧月旦偏饒舌
妙語通禪共解頤

柳陰競馬

余原在兵站總監駐下關大軍渡江後兼司總司令部事
日須入城視事傍晚騎馬出城恆與各將領馳馬柳陰中

數鞭齊舉馬爭馳楊柳陰中夕照時投筆未成纓未請
儒冠猶是舊丰姿

大觀樓醉飲

固鎮南宿州連捷清廷退位班師回南京宴各將領及女子炸彈隊於下
關大觀樓全座皆醉討袁之役下關爲馮國璋所燒大觀樓付之一炬

奏凱歸來宴侶儔當年曾醉大觀樓劫餘無復存灰燼
空對長江感逝流

民國廿五年一月高等考試授憑典禮日賦贈及

格諸君

以下民國廿五年

南天盛典喜宏開珊網搜來盡茂材人羨漢廷登董相

我慚魯叟鑄顏回艱難端賴賢良濟文藝先求器識恢
莫負今朝期許意經綸會見奮雲雷

題畫竹壽蕭佛成先生七十晉四

前年壽公我畫蘭去年壽公我畫松公今愈老節愈勁
霜雪凜凜生顏容我今潑墨寫此紙祝公平安日有喜
南山詩人賦竹苞我亦忝附君子交

題畫

我索劍父畫畫成索我詩吟詩豈易事爲我再畫之潑
墨畫此石突兀而嶽崎我爲補此蘭劍父多諛詞旣云
花色好又云葉多姿我畫甯悉稱無乃有所期索詩懼
逋逃作此狡獪施劍父甫開口我已窺其私爲詩題此

畫裝成懸壁時劍父再相過見之當解頤緣何我有心
子已忖度知

公愚教授以讀蓮香集詩簡余適枯桐主任在百

花塚左右闢路植樹因賦五言二十八韻以紀之

并序

張二喬百花冢其墓志爲黎忠愍遂球所撰書載於阮元廣東通志屈翁山題詩表曰北同青草冢南似素馨斜終古芳魂在依依爲漢家蓋有種族之深痛焉自是三百年來屢有修葺乾隆四十年廣東布政使姚成烈重修立碑以誌及四十八年張藥房太史王虛舟孝廉諸名宿復集爲清明上冢之憑弔喬一女子卒年纔十九何以能令後世相感若斯耶喬工於詩其詩往往見於廣東詩粹粵東詩海然其蓮香集則明本殆絕天壤即乾隆本亦難得完本矣公愚已以詩來復以集至瀏覽已竟亦歎天生此才之非易易而陳文忠黎忠愍眷之有由也喬冢在白雲山大學林場場主任黃枯桐適在此植樹闢路見公愚詩並和之余因紀以詩以彰二忠之微旨詩曰

昔聞百花冢未閱蓮香詩幾怪明諸老胡醉美人爲及

閱二喬詩復觀諸老辭始知明諸老於此寄深思

陳文忠題
喬畫蘭詩

難將公子意寫入美人心
黎忠愍喬誌銘每社事相期呵筆捧硯不能不悲其爲意又題蓮香集云在麗人生
爲漢艷死不污於胡塵彭子鍾情人也其不負麗人而忍負君父乎吾所以望其出而建忠孝大節凡此諸辭
皆有深思故明亡之際皆奮起盡
其忠孝而文忠忠愍死節尤烈

胡虜正猖獗明社纍卵危欲集忠義

士南天誓義師當時胡虜猖獗支持危局與之殊死戰者爲東莞袁崇煥而參其謀者番禺李雲龍也雲龍字烟客天啓末陳文忠以劾魏闢奪官歸日與烟客忠愍輩飲酒

賦詩以抒忠憤每言及國事未嘗不唏噓垂涕也見勝朝粵東遺民錄及阮通志聊且借醇酒托跡掩人知天生此

才藝解事大可資南園詩酒際意計救亡時紅袖供驅

策殆盡將世欺明亡非死事即將節義持見於蓮香集者陳文忠黎忠愍鄺湛若皆死節陳喬

生李定夫皆起義師彭孟陽從忠愍軍黃逢永歐主遇黎邦城李烟客區懷年梁漸子黃虞六謝長文王邦畿皆國亡遁迹或爲僧以終此中若參透不必再

疑滋喬死羣挽歌植花紀芳姿若祇關情愛何悉供驅

馳彭孟陽誅喬文云社人咸在共酌香醴案送葬挽歌植花喬墓域者有黎忠愍陳喬生梁漸子李定夫歐主遇黎邦城黃虞六區懷年數十人孟陽贖柩歸市

骨豈爲私公愚等夷論奧義仍未窺惟其天上月所以

照無遺惟其赤子心所以情無差人以豔事傳我爲諸

老悲此論我覺是人或視爲奇數百年後人縱評寧中
規得毋我笑人人亦反笑之芳冢屬管領妝臺石未移
關路兼植樹林場職所司古蹟例須保風雅寧敢追况
此一塊碑忠愍之所貽芳烈猶未沫能不令人思作詩
表微旨來哲論其宜

連日有傳余編蓮香集修百花塚者因戲吟此

二喬蓮香集編者彭孟陽我非南園人何能分其光原
書悉具在亦無事更張若竊爲風雅無乃太披猖

植樹與關路職司在林場適當百花塚豈專護遺香碑
石仍舊碣

百花塚墓碣係黎
忠愍遂球所誌者

墓門無新坊敢因此掠美致人議

其旁

題王濟遠畫冊

我遊世界記以文君遊世界記以畫世間事物莫嫌多
收入吾人一卷冊

謎言

以下民國廿五年

出國以來種種見聞
發爲謎言以寫我思

人類無等差膚色有種種咄哉白帝子自許天特寵卑
視餘芸芸若祇堪驅捧智者倡黃禍舉世驟惶恐環顧
深色人仍若不足重世掀惡風雲呼號誘人擁民族自
決潮乘時勢洶洶風息霧又來蒙惑更可悚正嘆天方
憤平等永爲壅無怪天驕子威燄至沸湧氣運原循環
消息已發動竊意消長機當卽不旋踵走獸思出牢飛

鳥思出籠况當智日開潛力亦漸鞏望蜀早有心矧業
已得隴屢仆復屢起此豈尋常勇我昔夢大同人多以
爲矇衆生若覺悟平卽光明孔壓難殺不易何若胞與
講此境若實現開眉笑肩聳酌彼我金壘消此塊壘腫
他年勁節看參天

黃山松谷寺紀事

以下民國廿六年

引流闢地佛堂前我與黃山結一緣殿建慈雲環種柏
前詩成十日再紀事

種柏有餘地補種桃與梅移來數株桂區老手自培沈
子爛園藝花木滿園栽卽此小規畫亦見經綸才黃山
新面目啓此一山隈邀朋共欣賞行當年年來

黃山歸途答人問

一住黃山經二月歸途爭訊景如何奇峯怪石前山矗
曲澗清潭北面多雲海茫茫時變化松濤浩浩自婆娑
說來也被山靈笑足跡原來半未過

回雁峯

峯在衡陽爲南嶽七十二峯之一甚矮小

我從衡陽來羣雁盡徘徊如何峯不見漠漠樹雲堆

龍泉寺雜詩

寺在南京城南三十里許在牛首山對面之斷石村

我住龍泉寺坐對牛首山山高四無障雲氣時往還寺
僧爲我言陰晴煞有關天晴雲氣淨陰雨雲罩巒萬方
正多難來此且偷閒欲占寺僧言每日望山間

山寺不妨陋石室卽洞天雖則無茂林修竹自翩翩曲

澗有小流泉水飲頗鮮不聞車馬聲但有鳥雀喧野菊
向人笑紅蓼及時妍漫云非桃源居之亦陶然

四山環成谷谷內有田園時艱須努力勸人秋種田出
資購種子看播行陌阡五日種出芽半月青連綿麥熟
可添膳菜長可嘗鮮不圖遭世變在此樂堯天

山中遇重九登遍四山頭陰霾一掃盡天朗豁雙眸長
江自西來蜿蜒若龍游鍾山在北峙王氣望正迺莫憚
風雲惡終當快讐仇預作黃龍飲恰好來良儔

山有望雲亭亭址不可求山有斷臂巖名以宋僧悠山
小無誌書閣者碑僅留古來爭戰地遺壘存山頭莫謂
山濯濯小松生已周待看成林後蒼翠接天浮

長江舟行卽景步理鳴韻

大江波浪接萬山雲樹連濛濛煙雨裏處處畫圖懸

廿六年十一月廿五日舟啓漢口赴重慶次日晨

望感懷

又溯長江上舟輪撥水忙爲求長禦寇遂計適巖疆夾
岸炊煙密沿途土壤良憑茲民富庶好靖敵猖狂

城陵磯

洞庭長江水合流湖南湖北地鴻溝一塔高標雲際上
萬方多難我來遊

長江行

君莫謂長江之水向東行一去不回太無情君不見長

江之水萬里流直到滄海方始休來自崑崙貫禹域形
勢蜿蜒如龍遊坦然夷險向前走千山萬峽不掉頭容
納衆流見懷抱晝夜不息氣優游誰云祇見去滔滔孳
孳福利實至勞滋潤氣候生萬物調洽性靈出人豪龍
蛇變化魚鼈長灌溉土地成腴膏造化神秘資補助利
物何曾遺絲毫吁嗟乎長江兮史光曄悠悠千古經萬
劫護我漢裔永安帖雖有夷狄來侵凌終憑此水能克
捷五胡以後繼元清歷史斑斑在眉睫一時倭氛縱披
猖行見此水灌之懼吁嗟乎長江之長兮天地同永日
月同光江水之流兮福利萬物周我八方一點一滴兮
何非天地精英吾民瓊漿

到沙市擬遊荊州不果

昔人借荊州今我祇神遊
蜀漢關成敗愴然注遠眸

關壯繆

得荊州蜀漢興失荊州蜀漢敗
魏吳分拒世訾公吳魏
皆賊夫何怪

三峽

三峽奇天下夙昔夢寐之不意
有此行敢辭紀以詩舟
從宜昌發起看月如眉曉星在天
閃微風向我吹行行
兩山逼方始出晨曦兩山夾水走
水流若競騎一至西
陵峽灘多難測推險惡數三珠石
亂如布棋上有大石
牛下有黃陵祠水流旋且急舟簸
行遲遲前行有虎頭

兩石南北持再進爲鹿角醜石激流馳鍋籠獺洞子江
心斜斜支上下羊背灘昔險今爲夷崆嶺橫巨石小石
復逶迤兩山摩天峙中有肝肺垂空舫方得渡名遂以
此遺舟過天爲陰水湍風鳴悲黃牛山峻拔白狗峽形
畝當中有新灘形勢最嶇崎亂石肆突出冬春堪獻歎
武侯兵書峽何處藏書爲香溪名由著生長有明妃鋸
齒與金盤石門在其楣大石橫江出四季舟難維屈原
三泡急蓮花三漩威一進烏牛口歸州見城池昭烈昔
蹉跌至今人猶思上溯人鮪甕石梁九道披前進至洩
灘床枕石參差母猪灘一過直至官渡涯已入巫峽界
山勢益奇離水流復屈曲石怪若瘤疵暢行至腹裡江

面水難羈再上布袋口楚蜀境分歧紫雲宮斜過道士
觀前池小磨大磨後山若列旌旗巫山十二峯赫然現
英姿連綿而突兀斜正勢相依峭聳愁猿鳥幻怪變蛟
螭蕭森寫巫峽杜老真能詞霸王杵未險老鼠水灣洄
莫畏跳石阻且渡筮望隈至直巫山縣神話實多資陽
台山高處神女祠所基爲雲復爲雨多少世人痴舟泊
陽台下入夢終依稀次晨舟再發山峽又重釐下馬三
纜子龍寶升子匡一一都經過瞿塘峽相隨瞿塘峽諸
灘其境悉屬夔夔峽初進口窄窄度岩屏天梯雖有路
鳥獸跡亦希始則山高曲繼則壁周圍上流開展處灑
灑堆險巖山有白帝城昭烈託孤兒磧有八陣圖武侯

却雄師夔府在山半孤城難臥治戰爭自今古興廢愴
情懷至此三峽盡大觀歎若斯嗟哉奇山水每與險附
麗三峽兩山夾森立若班排齒牙勢相錯大小石纍纍
江底堆石塊江岸橫石磯水在其中流冲激見時時激
湍成跳鼠冲波如奔騅三峽長千里更易肆封姨簸蕩
勢汹涌號鳴如吼獅峽水真幻譎問誰與等衰西陵峽
山怪巫峽峽山危瞿塘峽山峻三峽無平陂萬山重重
裏四望盡崔巍有斜復有正有高復有卑其形有男女
更有似虎狽或爲旗爲戟或爲籬爲箕千奇與百怪難
狀堪嗟咨峭則如刀切高則插天疑斜峯橫側嶺幻妙
出常規處處有巖洞常常有煙炊田園在山上民勤菜

麥肥山石成五色畫筆何淋漓石山多不毛有樹亦瘠
羸山間生草處紅綠柔如肌時有小懸流水復鳴嘶嘶
山壁懸鑿路勝天人功施間有塔點綴風景益增宜峽
石激水成怪狀難比其有縵如老叟有裂如神龜有枯
如朽木有鋒如利錐有則岸然立有則聚成堆有則肖
花果有則狀亭臺若欲拜奇石當不勝胼胝我舟在峽
行舟行岸不移倏而前無路倏而後無達仰視山爲悚
俯視水長嘻灘急水鳴處每每神愴而此行天若迓雲
霧悉一麾千山復萬水日看莫知疲爲山添顏色朝曦
與夕暉爲水增活潑魚躍與鳶飛馬羊少牧畜鷄犬時
遊嬉漁網掛村落舟楫聲啞啞不聞猿啼岸但見鳥從

雌誰云蜀道難暢觀豁心脾足跡縱遲到山靈莫相譏
峽山峙萬古峽水流無期山水悠悠處有我與之偕爲
詩刻山水天地洩神奇

張桓侯

雲陽城隔口有桓侯
廟廟井有桓侯頭

雲陽舟過弔桓侯水咽灘鳴恨不休留得頭顱千古在
河山終屬漢春秋

石寶寨

巍然一寨峙中流却寇當年保一州奇水奇山產奇女
令人肉食鄙公侯

涪州

山環水滙古巖城昭烈當年譎用兵縱領江山仍漢胄

閱牆兄弟總傷情

霧

三峽以前天氣清三峽以後白霧橫天若耑誠迎遠客
者番端不負川行

蜀民

蜀地無曠土蜀民眞勤苦勤苦胡顛連哀哉政如虎

重慶

水環三面據山岡形勢天然鎮四方憑險一夫堪敵萬
臨江數路可通航太王避狄曾遷徙句踐亡吳在臥嘗
成旅猶能再興夏旌旗千萬慶重光

廿六年十二月十三日書憤

驚聽失南京愴然百感生自慚尸肉食無術衛都城蹂躪悲民衆傷亡痛士兵深仇身必報天日誓精誠

塗山

我來古巴國遂作塗山遊山明復水媚乘興遍探幽山麓禹廟廢何處謁冕旒呱呱啼處碑真武廟側修夏后塗山字尙留在山頭禹娶塗山氏祇載在江州塗山有數處聚訟遂不休其一在當塗當日會諸侯其一在會稽禹穴在其丘遂謂禹娶此世多不稽鈎當禹娶塗山二地未懷柔從何娶彼女白狐成譚謳禹本生於蜀巴郡娶所由遮夫灘在望啓母石可求塗村復塗洞遺跡實悠悠塗山在巴郡漢志無可不乃知禹巴娶生子方

東游東游致羣臣始在江東陬塗山名雖一地實各不
侔我今來尋勝索古慕遠猷不惟山可愛尤覺功難酬
奈何我禹域今竟遭橫流河山失顏色神裔受踐蹂對
此益興奮敢緩匡復謀披戴事雪恥勿令塗山羞

南溫泉

巴縣多溫泉南泉居其一城市難賃居暫此容膝渡
頭乘舟來夾岸山巒密怪石峙中流危岩遮天日世云
小三峽形勢眞肖畢松竹遍山生尤添我情逸因境想
桃源驟見人家出鷄犬不驚人田園有丹橘烏雀自飛
鳴流泉當琴瑟不必浴溫泉塵垢頓消失居此常濯身
日新自可必泉源混混來其溫玉莫匹築塘蓄溫泉大

小式不壹衆浴與獨浴興趣不一律入浴不拘時男女
各有室此已快身心何況能去疾餘興若登山建文曾
駐驛神女復神仙二洞深難悉若欲觀懸流澗窄水橫
溢萬馬似奔騰聲如虎可恍若小立橋頭風定水靜謚
每當星月明清趣莫可筆溫飽非素懷山水愛如蜜此
樂未敢私作詩與世述

澄廬詩集卷七終